



Ioannes natus est Bischoffsheimij ad Tuberum flumen Franciæ Orientalis oppido, ditionis Archiepiscopi Moguntini, anno circiter 1499. patrem habuit Georgium, matrem Christinā, mediocris fortunæ homines. Horum suafu in patria prima literarum rudimenta didicit, atq; postea à Martino Golio Decano Aschaffenburgense, cognato suo, Erdfordiam missus fuit. In eo loco cum artibus aliis quandiu incubuisset, Ingolstadium abiit, & nobiles aliquot adulescētes priuatim instituit. Inde Monachium uocatus, ludo Poëtico præfectus fuit, in quo nobilium pueri instituebant. Verùm cum animus ad maiora respiceret, eam functionē reliquit,

& Friburgū Brisgauriæ concessit. In ea academia denuò priuatos aliquot nobiles erudiendos suscepit. Cum autē ipse facie liberali & mediocri statura conspicuus esset, in Euxæ uenustissimæ puellæ, Florentij Hefsleri mercatoris filiæ, notitiam peruenit, & eam uxorem duxit. Cupiebat quidem in eo loco permanere, & publicam aliquam professionē administrare. Verùm cum de Lutheranismò suspectus, & quibusdā inuisus esset, nihil tale impetrare potuit. Itaq; commodè accidit, ut Basileam ad Rhetoricam & Latinæ linguæ professionē uocaretur, anno 1525. Eam uocationem ipse suscepit, & Ciceronis Rhetorica cum Tito Liuio & Quintiliano in ea academia exposuit. Cum etiam in Quintilianum annotationes scripsisset et edidisset, in Typographorum notitiā peruenit, atq; ijs ob insignem eruditionem gratissimus fuit. Tum etiam Iustini historiā & Prudentij carmen restituit, & ut idem in alijs authoribus faceret, à uiris doctis admonitus fuit. Id ut commodius faceret, à Ferdinando tum Archiduce Austriæ Diploma impetrauit, ad omnes Ecclesiarum suę ditionis Bibliothecas perscrutandas. quod quidem is gnauiter præstitit, & literarum studia plurimum adiuuit. Incidit tum fortè in Codicem Theodosianum, à multis iam seculis desideratum. itaq; eum primus edidit, & Ferdinando, ut se gratum declararet, inscripsit. Hinc factum ut Erasmo, Glareano, & alijs uiris doctissimis, tum Basileæ de gentibus, familiariter notus fuerit.